



傅忠肅公文集卷之中

啟

賀太宰啟

伏審命出中宸名登上袞千齡際遇注帝意以彌深九
牧臚傳浹民情而共慶恭惟驩慶竊以文昌之賦庶政
實^為喉舌之司僕射之長百僚時迺腹心之寄粵聖神之
御宇酌古昔以經邦肇新相府之聯增峻台躔之望官
不必備久虛位以詳延道之將興宜異才之間出伏惟
某官學窮精稷識探幾微下筆屬文煥發群言之蘊圖
事揆策規恢億載之基進陪熙洽之辰徧歷高華之選
周旋三省密勿九年稽前聖之典謨益見大儒之效練

本朝之制度獨高舊德之 逮此疇咨果膺爰立昔蕭
曹漢之賢相務清淨以寧其民若房杜唐之 臣亦彌
縫而藏之用佇推諸道以福 人則名譽垂於無窮而
姦邪為之不起曾是庸虛之質夙叨庇賴之私三后協
心尚覲迓衡之治百官承式願輸後志之勤

賀尚書右丞啟

伏審顯奉殊恩入參大政側聞渙號俯慰輿情惟上聖
之端臨當英豪之並進左右輔弼如衆星之拱北辰上
下歡欣若巨魚之縱大壑迺春文昌之重寄尤資樞憲
之得人今上帝然而恢皇綱彌綸於政本謀王體而斷
國論斟酌於化原自匪名儒曷膺茂典其官稟淳明直

亮之德賦瑰偉博達之才窮六藝之淵源臻乎道奧激
百家之腴潤驅於筆端出逢熙洽之辰薦被高華之選
紬書冊府削草諫垣瑣闥雍容雅有回天之力霜臺慷
慨凜然憂國之風旋躋內相之榮俄易地官之長雖藉
研桑之心計復思嚴樂之筆精逮再直於禁林端獨承
於淵旨令聞令望為多士之表儀嘉謀嘉猷作本朝之
龜鑑果茲超拜允協僉俞元首嘉股肱之良大厦得棟
梁之助方將與臯夔稷契共成堯舜之功豈特俾魏杜
戴劉同專唐室之美益昭賢業永輔明時某嘗辱衮表
屬茲匏繫庇身有地始知厦屋之幘幪播物無垠願預
大鈞之塊土其如欣躍實倍等倫

賀戶部尚書啟

伏審趣頒召節誕布除書任劇六曹實總萬方之計位
隆八塵密毗二府之聯凡在見聞率同鼓舞恭惟某官
學窮宏奧識洞幾微以慷慨憂國之心蚤膺簡任以經
綸佐時之略茂著猷為才無大而周事雖難而必濟
自播學宮之舉旋躋郎省之華出總使權最善朔方之
政入持荷橐尤高省戶之功粵陞秘殿之隆遂昇帥垣
之重報三月之政果膺仄席之思賜十行之書亟奉造
延之對迺眷地官之長允資心計之優必使不益賦而
用饒庶幾有餘財而頌作然後入登於近弼蓋將永輔
於休辰輿頌所期斯言可必某稟生至陋蒙眷甚深雖
嗟枯吹生每借揄揚之賜而擗朽磨鈍難追英俊之游
側聆出綉之音猶動彈冠之喜青蠅之飛數步敢妄意
於絕群鷦鷯之巢一枝願永依於餘蔭

賀內翰賓客啟

伏審參謀猷於內相密承當宁之知職調護於東朝榮
被出綸之命傳聞四遠欣愜一詞恭惟睿聖之臨朝願
隆國棟迺眷元良之貳體肇建皇儲淵乎鶴禁之嚴倬
彼龍樓之奧入有師而出有傳謹擇於宮僚見正事而
聞正言允資於友益是以取象於四皓於以增光於重
離宜得真賢來膺茂典伏以某官圭璋挺器杞梓呈材
與學鈞深窮淵源於子夏高標映世瞻模楷於李膺久

持荷橐之華薦直鑿坡之秘載頌睿渥入備東賓陳賈
誼之言固欲輔成於道德草土褒之詔豈惟娛恃於文
辭其夙荷殊私久依大庇望風引領徒勤燕賀之情承
顏接詞莫遂鳧趨之願其如欣頌實倍等夷

賀舍人啓事啟

伏審鳳閣清華密簡淵衷之眷龍樓奧秘榮兼端尹之
崇遐迩傳聞士夫欣頌永惟建國之本孰先主噐之良
雖岐嶷挺乎生知而溫文資乎幼學欲明道術智誼之
指日就而月將必擇左右前後之人繩愆而糾謬宜得
端士迺允僉言恭惟某官雅量澄波高標峙岳淵源與
學黜惠子之五車博極洽聞陋張侯之三篋言語妙乎

天下名聲重於朝廷雍容西禁之嚴參總東朝之務太
宗之用李勣雖暫屈於階資劉憲之事明皇欲留意於
經籍載稽盛德宜掩前聞某遠託餘光夙叨末契觀絲
綸之誕布徒傾賀屢之誠瞻弄著以非遙莫遂趨風之
便其抃躍難既敷宣

賀虞純臣戶部侍郎啟

伏審經賦中臺絢書藏室宸廷日侍增從橐之光華海
宇風傳聳儒林之觀聽恭惟某官受材膚敏造道淵源
若延年之安和備詳于諸事如于政之洽浹博綜於群
書外徧總於使權中再直於憲府名聲藉甚功效卓然
自擢貳於王城亟超登於卿寺逮茲異數盡出深衷節

制度以阜民財暫煩於心計搗文章以緯國典更賴於
筆精佇膺反席之求遂正秉鈞之拜某登門最奮處世
多竒雖感慨激昂思稱眷存之意而棲遲困抑莫陪英
俊之游側聞出綍之思猶動彈冠之喜鳳凰翔于千仞
方為瑞於明時鷦鷯巢於一枝願永依於巨庇

賀光祿卿啟

伏審肅承中詔寵陟正卿睿眷方隆姑詳試於衆事貴
名增重實大慰於群情恭惟某官雅性內融清猷濬發
議論忠直有愛民憂國之風道術通明有博古練今之
學居皆可紀去必見思昨進總于漕臺旋入毗于京邑
坐浩穰之治載規盤錯之能逮茲三遷曾不累月蓋

功多賞厚宜蒙優渥之恩而官顯職閑佇膺侍從之選
引領以冀斯言不謬

賀曾叔夏除秘書少監啟

伏審顯承制檢榮貳書林在於見聞孰不欣快惟國家
廣右文之化眷圖籍盛中禁之儲凡居三館之流必極
一時之選矧典領於庶事將模楷於群英非博物洽聞
學摠萬方之畧而成德懿行身兼教器之長曷穆師言
用當帝眷某官造顏閔之極摯窮游夏之淵源謝琨風
華宜居第一壽王智畧可謂無雙蚤自著于明時遂擢
登於要路詞人墨客爭飄新章東觀南臺共傳妙譽逮
出將於指使旋入替於國師搗筆見重于青宮剖竹屢

移於宅蓋方倚濟民之術俄興將母之思真館燕居雖
鬱播紳之望親庭色養幾忘軒冕之榮果膺側席之求
亟奉賜環之寵太宗下德音之詔蓋賴振於高風九齡
草渤海之書豈特稱於雅度佇聞異渥超真近班某頃
託帡幪嘗叨眇睠望風引領徒勤燕賀之情承顏接詞
莫預鳧趨之列末言悃悃難既敷宣

賀祝幾叟除軍器監啟

伏審顯膺中詔擢據要津恭惟慶悋竊以某官厚德鎮
浮高標映世兼求賜之達藝窮游夏之淵源發濬儒林
含香華省登車攬轡瞻孟博之威稜輓粟飛芻陋弘羊
之心計較然課最簡在宸衷逮茲絲檢之頒果奉蒲輪
之召眷惟五監實次六卿方朝廷尊榮人咸知於重內
矧國家閒暇政尤急於除戎行聞晝接之餘遂席從班
之列某誤叨眷獎久竊庇庥承顏接辭莫遂延賓之列
望風引領敢忘執御之儀

賀王元將左司啟

伏審顯被詔除榮聯宰屬傳聞四遠欣悋一辭惟神考
之大猷參前王之成憲方熙寧厲精於政本肇新檢正
之負逮元豐董正於治官始建都司之自上承二轄下
總六曹任遇益隆每補侍臣之缺諮詢所賴常參丞相
之謨自匪名流曷諧僉論某官清標濬發雅性內融學
博綜於群言文咸工于衆作居官可紀藹然良吏之風

見義必為展矣仁人之勇果動中朝之譽寔階上宰之
知紬繹圖書校讎秘典繼奉薦延之寵密承清燕之間
寤意一言已布褒賢之旨隨機獨誦尤高達禮之聲載
簡淵衷用頒渥澤如元衡之詳整詎止于三遷若方進
之通明寧淹於旬歲佇聞善績超真從班某蚤接高標
謬蒙深眷抗塵走俗誰憐范叔之寒引領望風竊效貢
公之喜永言悃悃難既敷宣

賀虞純臣監察御史啟

伏審顯奉明綸入參憲府士夫交慶遠邇同詞惟上聖
之保邦掩前王而圖治練群臣而核名實既大正於官
邪揚鴻烈而章緝熙將坐清於政本眷茲風憲之地實

為耳目之司贊論議於臺中必得通達之士振紀綱於
轂下尤先亮直之才恭惟某官氣鍾河嶽之靈性挺圭
璋之美柔不茹而剛不吐事可法而容可觀溢於文辭
蔚若嚴徐之辯藝於政事綽然求賜之賢傳王謝之風
流被洪寬之綠飾進由德選結自主知攬轡觀風豈特
詳求於吏治褰帷問俗固嘗博究於民情夙推剌舉之
明藹擅平反之譽然肅傳之意雅在本朝而谷永之心
常存省闈果膺睿渥擢處要津名聲重於一時風采聞
於四海涉赤墀而登文石方密奉於清光歷金門而上
玉堂佇超躋於法從某屬拘官次莫造賓閣傾頌寔深
敷陳罔既

賀虞純臣復監察御史啟

伏審王廷錫命方假虎符帝宸記功復還烏府凡叨眷
獎舉集欣愉恭惟某官道術通明議論深博被服周孔
之訓淵源游夏之文仁以義事君蓋無施而不可用儒
雅而飾吏故所臨而有聲頃自南臺出居真館既屢更
於歲律寔大鬱於輿情果奉明綸言歸舊貫盡出聖神
之獨斷曾微左右之先容矧茲六察之聯分糾百司之
謬明目張膽將振舉於朝綱褒德錄賢竚起登於法從
某辱知有舊稱慶瞻紫詔之優隆徒勤頌詠願青衫之
牢落永識依歸

賀陳國英領事啟

伏審疏恩中禁領職合官凡在現瞻孰不欣快惟聖有
作與天為徒參稽三代之文祖立九筵之制臨朝聽朔
獨觀乎萬化之原攷古建官分命以四時之事豈特謹
陰陽之端而明庶政固將協終始之序而熙百工非時
之髦不預茲選恭惟某官躬稟淳明之質兼通敏之
才學必造於淵源行不踰乎閭域蚤膺簡拔荐著猷為
蘭省陞華蔚然高績琳宮就佚藉甚休聲密承堯舜之
知擢貳義和之政上泰階之政方賴於明謨登赤墀之
除竚躋於法從某夙叨眄睐阻奉光儀側聆綸綍之頒
但切門闈之慶

賀周文翰除待制提舉醴泉觀啟

伏審簪筆持橐榮躋侍從之聯就日望雲密奉清閒之
燕遂留真館以便告猷綸綍既行縉紳胥慶恭惟某官
繼韋平之經術傳王謝之風流孔鯉過庭嘗聞學禮狐
毛能仕蓋本教忠方賈誼之少年若馬周之素宦藉甚
漢庭之譽煒然蕭葉之光未膺傳野之營求久嘆周南
之留滯明珠無類掩萬仞以騰輝勁竹有根貫四時而
挺節坐更而紀歷事累朝卻穀之嫌名閱詩書嘗先於
謀帥黃霸之奉宣詔令尤長於治民建茲千載之逢適
契一言之寤緬懷先正夾輔前人是為社稷之臣豈特
棟梁之用啟金縢之策既彰姬旦之勲列麟閣之圖復
冠霍光之右特書典策永勸臣工始知天網之無私終

見相門之有子載頌新渥式寵世臣峻內閣之清班總
列仙之秘宇楓宸備問已符丹宸之思賢槐鼎調元佇
席青氈之圖舊某夙叨末契嘗辱殊私瞻紫詔之優隆
徒勤頌詠顧青衫之宰落竊有依歸

賀陳國珍集英修撰啟

伏審疏恩中禁就佚真祠冠書殿之隆名參曲臺之鉅
典綸言始布輿誦交歡矧叨河潤之恩尤切屢成之慶
雖國家享魏魏之治海宇成郁郁之風謂建功之路益
多而賂職之稱尚寡嚴褒序之法既增設於九尊資論
譔之官復肇新於三等自匪傑出之士孰膺超授之榮
某官雅性內融清標濬發柔不茹而剛不吐事可法而

容可觀博通前古之宜練達當今之務出逢熙載擢寘
要津精敏之才譽高華省淵源之學望重合宮載簡清
表果頒異數方將休息于篇籍之圃翺翔于禮樂之場
遂登禁近之聯用席公台之路顧如弱植早接高標引
領望風采結搖搖之志裁緘寫抱徒彈軋軋之辭願以
微軀永依巨庇

賀留守大資再任大名啟

伏審光膺寵渥顯錫命書陞秘殿之崇資壯留都之重
寄伏惟慶慰恭以某官智周物表學優域中博通前古
之宜練達當今之務世載令德獨映明時自結清衷荐
更劇任進擢地官之長仍兼天府之繁綱總紀于中臺

號魏杜戴劉之稱職贊機衡於西省有臯夔稷契之嘉
謀逮均逸於中山益流聲於外闡迺瞻北門之巨屏實
惟全魏之要津控強虜之咽喉繚洪河之襟帶疇咨元
帥允藉壯猷布惠頒條善政亟成於五月折衝制勝威
稜遠憺於殊方確乎柱石之姿隱若金湯之固浸更歲
律大鬱師言蓋對揚王休雖久佇弼諧之益而徒得君
重故尚勤綏御之方用峻隆名肆頒異數載懋優賢之
禮式昭體國之忠民吏均歡不改旌旗之舊士夫竊頌
行同衮舄之歸惟是孤踪久陶大冶覩絲綸之誕布徒
勤燕賀之誠瞻屏著以非遙莫遂鳧超之願其如欣抃
實倍等倫

賀留守太尉啟

伏審授鉞齊壇誕布絲綸之寵分符留鑰出當屏翰之
維凡預眷存舉深欣快恭惟某官受天地之氣稟河嶽
之靈窮六藝之遺文臻乎道奧激百家之芳潤驅於筆
端蚤逢特達之知亟踐高華之選挺然勁節疎聞異域
之中藉甚英聲曩出本朝之右粵自北樞之宥密遂參
西省之幾微禦侮折衝威制百蠻之命贊元經遠規恢
萬世之功去國十年秉心一節顧艱難備歷曾肯縻之
未忘果膺黼辰之思亟被鋒車之召賜便殿之對密承
三接之恩新秘殿之名欽奉十行之詔永懷舊績載舉
徽章式嚴上將之儀增重北門之寄宸心允屬海宇具

瞻大纛高牙暫煩於卧護元衮赤寫共佇於遯歸益隆
千載之期永輔三皇之治某夙叨眇昧嘗守品題徒勤
賀屢之誠阻預曳裾之列其如欣抃實陪等倫

賀梁才甫建節再任大名啟

伏審誕敷制命寵建節旄嚴上將之威儀仍陪都之管
籥凡叨頌遇舉集欣愉竊以漢命司徒實重將軍之寄
唐分方鎮始知節度之名粵我治朝參稽往制非耆德
宿望均體股肱則元功盛勲任國柱石方奉揚庭之號
因膺賜鉞之榮恭惟某官外博而內融識周而道遠身
履衆善兼孔門之四科世載令名繼虞廷之八凱蚤值
千齡之會每殫一節之誠用無施而不宜事雖艱而必

濟入參大政聲蕭曹丙魏之謨出殿近邦著邵杜龔
黃之善最進退有度夷險莫渝自再佩於麟符既屢頒
於鳳詔裴度未老久卧鎮於北門申伯于蕃宜圖居於
南國亟奉齋壇之拜益隆岩石之瞻大纛高牙方折衝
於樽俎元衮赤舄佇遄歸於廟堂某久辱眷憐屬茲拘
窘未遂掃門之願徒勤賀慶之誠

賀徐帥以宮使召啟

伏審顯膺帝綍入覲王庭賢人在朝自厭無形之難聖
王求舊方圖不世之功成命一行歡言四布恭惟某官
德推國器學擅儒宗以經綸兼善之才自結當宁而承
平極治之世薦據要津論不詭於聖人議有益於天下

內參承轄建教化而圖安危外總帥垣

太上詩書而閱

禮樂雖艱難之備歷曾肯綮之未嘗志在憂民故居皆
可紀忠唯愛國故知無不為英俊所以慕義而心降姦
邪為之聞風而膽落確爾柱石之固凜乎霜雪之嚴暫
從琳館之優亟奉銜車之召造明朝而承問密賜清晏
之間好忠諫而悅至言極陳治安之策然後茂敷於寵
典遂將永冠於元鈞某蚤被眷知屬拘官次情同巢燕
方希大廈之成困若鮒魚行冀西江之決其如瞻頌難
罄敷宣

賀張師于除運副啟

伏審顯膺宸眷出總漕樞恭惟慶慰竊以列土分城朔

部實本根之地乘輅建節外臺為耳目之司矧當富庶
之期尤重轉輸之寄將以佐大農之調度必能通萬貨
之盈虛苟非其人不預茲選伏惟某官高風邁往厚德
鎮浮知無不為既薦更於劇任忠而能力蓋自結於淵
衷藹然譽望之隆卓爾功庸之茂眷茲北道昔仰使華
劉晏之才耻粒食之不運桑年之智獨心計之無垠固
嘗博採於民風豈特周知於吏治逮再頒於明命益下
聳於歌謠未博駐車衆共驚於決遣范滂攬轡志雅在
於澄清佇聞奏課之優遂陟從班之峻某區區晚進碌
碌諸生閭里相逢蚤有登門之舊幘幪所逮敢伸賀屢
之誠

賀沈和仲除秘閣修撰陞運使啟

伏審就遷使指加寵書林綸紵始頒措紳胥慶竊以內
閣論撰之職密亞從班外臺轉輸之權最稱劇任必才
德之俱備與資望之素隆乃奉明駁併膺異數恭惟某
官嘉猷經遠敏識造微博通前古之宜練達當今之務
會逢千載自結九重含香握蘭譽高郎省蜚芻輓粟坐
給邊屯固已致萬廂之盈豈特有三年之委造明朝而
承聖問深契於淵衷褒有德而報厥功荐推於茂典眷
惟朔部久仰威稜矧聞盤錯之虛載治澄清之化遂躋
宥密以席公台某頃伏下僚嘗叨外舉望風引領但勤
賀屢之誠承顏接辭方阻登門之願其如欣抃難罄敷

宣

賀沈和仲運使陞右文啟

伏審密承睿渥光奉寵章就陞書殿之華增重計臺之
寄凡叨眄睐咸集歡愉眷上聖之端臨方群才之並進
歷世磨鈍肇新優美之名褒賢顯功副致侍從之列恩
榮超異序進惟艱恭惟某官河嶽炳靈圭璋特秀淵源
之學映照儒林卓犖之才羽儀仕路入踐郎曹之要出
分使節之光嘉績藹然休聲藉甚堪躋冊府移揔漕權
中宸寶秘之儲內閣論撰之職繼膺妙選益簡清衷屬
貢教之聿興華夷風之方煽明詔每下常恐斯人之未
孚碩畫既陳坐致列城之丕變果動冕旒之聽亟聞綸

綽之頒歷金門而上玉堂佇還登於近密攀台階而窺
紫闥遂進輔於休明某頃伏下僚謬蒙深眷困同斥鷃
但騰躍於藩籬共鷓鴣願翱翔於梁棟

賀李

太仁除直秘閣陞運副啟

伏審黼宸酬勲絲綸錫寵就躋榮於秘職仍增峻於使
權凡叨河潤之恩咸集屢成之慶惟國家推右文之化
眷圖籍盛中禁之儲倬彼東壁之躔煥乎群玉之府既
得殫見洽聞之士紬繹其間又俾抱功修職之人光華
于外自非遴選曷副僉俞恭惟某官酌道德之淵源漸
禮樂之腴潤學優而仕行孚而名自著明時薦更劇任
登車攬轡瞻孟博之威稜輓粟飛芻陋洪羊之心計將

使有餘財而頌作豈特不益賦而用饒逮茲歲月之淹
益簡聖神之眷肆頒教允答殊功民吏均歡遠契借
留之願士夫竊頌行聞趨召之恩某嘗辱品題屬居官
次莫遂門闈之慶敢忘尺牘之修

賀沈糴使除直秘閣賜金紫啟

伏審入簡宸衷出膺綸告書林寓職載昭稽古之功命
服表容益懋崇賢之典傳聞四遠欣慙一詞眷睿聖之
敷文搢爵賞以勵世由內及外咸歡於工師惟器與名
每難於授受况麟閣極一時之選而金章著三品之儀
偉寵數之兼隆寔士夫之榮遇恭惟某官崧高毓粹昂
宿騰輝酌道德之淵源卓爾儒者之效漸禮樂之腴潤

充然君子之容蚤結綬於學宮荐合香於計省登車問
俗既頒政於六條廣粟備邊遂舒憂於九歲方馳誠於
魏闕俄奉最於甘泉三接對揚望清光之咫尺十行誕
布頒異渥之便蕃內聯英俊之躔外煥星華之節賜郭
賀之黼黻秩物斯隆褰賈琮之帷裳澄清允協風采聳
聞於天下名聲益重於朝廷席是休恩竚聞趨召石室
金匱細書還筵於芸臺金馬玉堂簪筆亟持於荷橐願
如愚朽竊仰庇庥承顏接詞莫趨賓廡望風引領徒激
歡悰

賀提刑啟

伏審錫寵中宸宣威甸服綸言誕布輿論交欣眷大明

之保邦歌皇華而遣使化自迓始先畿內以觀風澤欲
旁流俾方垂之作則共底措刑之盛尤高執憲之推議
獄釋寃賴平反於次骨督姦懲惡資決遣以如神苟非
傑異之才曷副詳求之意恭惟某官高標峙玉雅量澄
波家傳王謝之風流學富韋平之經術蚤陪熙運亟據
要津出分朔部之憂增重外臺之寄眈歲時而斂散民
忘艱食之虞闢耳目以澄清吏盡竭情之報風米聳於
天下名聲重于朝廷卓然課最之休乞矣淵衷之眷謂
緣人情而制法固非俗吏之為若傳古義以決疑必有
儒者之效故茲褒擢式協都俞瞻華闕之岩堯方趣裝
而首道望清光之咫尺佇前席以疏思獨怜策蹇之愚

幸遇登龍之末敢同燕雀聊伸賀屢之誠願與兒童共
致攀轅之戀其如欣抃實倍等倫

賀林德祖提學啟

伏審光奉宸恩寵將使指綸言誕布輿誦均歡恭惟某
官松柏挺資圭璋成器無雙流譽獨高荀爽之八龍累
百論長蚤擅彌衡之一鶚休息乎篇籍之圃翱翔乎禮
樂之場窮言偃之淵源陋賈山之涉獵賢閔擢秀朝路
陞華絳帳崇儒尚淹鱣席青壇圖舊且集鳳池果被荐
延亟頌渥澤入對清閑之燕出分刺舉之推效孟博之
澄清此其時矣瞻李膺之模楷竊有埃焉某承學諛聞
抗塵俗吏屢成燕賀已紆巢幕之憂林茂鳥歸終冀栖

枝之樂永言欣躍寔倍等夷

賀提學察院啟

伏審宸衷錫寵誕膺褒詔之榮吳會觀風復被星華之選傳聞四遠欣慙一詞恭惟某官杞梓呈材圭璋三篚蚤由射策擢秀賢關自致明時陞華要路紬書東觀咸推良史之才執憲南臺雅擅直臣之譽逮出分於使指方遠布於教條攬轡澄清已肅范滂之志下帷講誦猶傳董相之經眷茲綸綍之頒益聳措紳之望雖地分二浙資領袖於百城而途經上都佇對揚于中禁遂躋從橐永輔昌圖某晚學微生備負下邑披雲有幸嘗叨游霧之恩窺豹何知徒切攀轅之志欣依蕪極敷述奚殫

賀提學博士啟

伏審光奉宸恩寵將使指除音始布已傾多士之心德望所臨寔聳列城之聽恭惟某官圭璋挺質杞梓呈材下筆屬文仲舒本淵源之學潛神默記孟堅推通敏之才夙高絳帳之名薦中青錢之選浸承睿渥進秩賢闈妙摠六藝之文夙出諸儒之右眷齊魯之奧境有孔孟之遺風方國家明道德之源而郡縣謹庠序之教莪冠博帶競集於儒林揭節乘輅宜資於德器果被光華之選出分剌舉之權拂霧披雲孰不快于先覩褰裳負弩方幸廁于前驅瞻倬之勤顛沛于是

賀梁方甫知青州啟

伏審簡宸眷之優隆奉聖書之溫厚起從散地還畀名
藩遐邇傳聞士夫鼓舞恭惟某官人倫準的帝室棟梁
出入周衛之中從容廟堂之上鳳池經體藹然丙魏之
聲麟鑰承流卓爾龔黃之政頃坐單辭之誤存貽左授
之辜仲華遽榮悴之交子文無喜愠之色撓之不濁仰
之靡高果軫睿慈亟頒渥澤慰籍甚厚毗倚增隆眷茲
海岱之區尤先獄市之寄俗濶達而多知吏紆緩以養
名太公始封務行平易之化曹參為相亦隆清淨之風
欲詔令之究宣俾群黎之悅服則其謀帥實重得賢吉
甫文武之才萬邦為憲申伯柔惠之德四國于蕃暫偃
息於鈴齋佇還登於鼎鉉某夙叨末契嘗辱薦書瞻綸
命之既頒喜深鳧羨仰台躔之方煥終托陶鈞引跂門
墻神魂飛越

賀徐擇之換延康知汝州啟

伏審宸衷眷舊綸告敷榮新秘殿之隆名鎮臨汝之興
境傳聞四逮欣慳一詞恭惟某官勁竹有筠明珠無黷
藝求賜之政事師游夏之淵源持轄丞疑擅戴劉之美
譽承流屏翰追召杜之遺風道易地以皆然才何施而
不可仕無喜而已無愠忠貫子文撓不濁而澄不清量
包叔度心常存於省闈意雅在於本朝退處真祠出麾
便郡徒得君重簡在帝心薄淮陽之行寧久煩於卧治
肖傳巖之夢固匪待於旁求佇 賜環即叅調鼎某昔

叨掾屬常辱褒嘉瞻鳳檢之優隆徒勤燕賀想龍門之
容接莫預鳧趨

賀鮑守啟

伏審中禁疏恩左符出守方趨裝而首道已歡誦之載
塗恭惟某官雅量澄波高標峙玉傲墳典之場圃游道
德之平林奧學醇師窮淵源於游夏懿文華國粲摘藻
於班揚自著明時擢登要路飛芻輓粟外摠使華含香
握蘭入叅省闈休聲藉甚明效卓然暫均逸於琳宮俄
思賢于黼辰弱翁方且大用治行蓋已深知長倩雅在
本朝政事欲其詳試乃眷廣平之望郡寔惟河朔之奧
區俗雜趙之風分當昂畢之野徒得君重聊資游又
之才對揚王休行被賜環之寵夙叨末契嘗仰餘光林
茂鳥歸幸將依于巨庇屢成燕賀喜實倍于衆人

賀通判朝奉啟

伏審顯奉帝恩同宣王化方趨裝而首道已騰誦之載
塗恭惟某官仁本天資忠繇世躋身端行治蚤推南國
之英功著職修久動中朝之譽果被出綸之命來分半
刺之權題仲舉之輿既膺妙簡展士元之驥宜有宏規
固將大慰於群情然後亟躋於要路願惟弱植竊伏下
僚披雲霧而睹青天佇高標之是仰倚門庭而搯絃篳
想至德之可師欣頌交深敷陳罔既

賀林德祖除府司錄啟

伏審顯奉制恩榮參天府傳聞所暨欣慜攸同眷上聖之保邦繼先猷而創制謂神州

魏魏萬乘之居而

睿澤旁流翼翼四方之極並建掾曹之任總說紀綱之司奉令頒條密贊百司之化繩違糾滯中分一府之權蓋其官顯而職閑故必才高而望重副茲遴選允屬名儒伏惟某官與學醇師清忠奕世深明經旨久下伸舒之惟默纂聖謨嘗給相如之札頃由泮水擢領外臺攬轡宣威既周知於吏治攝齊問道方大振于儒宗卓然治行之優藉甚士夫之譽速還朝著式簡淵衷果聞綸綍之頒深慰輦轂之望涉赤墀而登文石佇入對於清光闕紫闈而攀台堦將盡摠於素蘊某辱知有舊稱賀

無從延跂門闈徒勤方寸

賀徐帥啟

伏審光膺宸眷寵錫命書名兼秘殿之隆地列東藩之重側聞孚號實允僉言恭惟某官道術通明行能高妙伏願閔之軌躅窮游夏之淵源簡在清衷進躋顯仕謀王體而斷國論謨先聖之大繇今上帝紘而恢皇綱致至治之成濬休聲藉甚明效卓然眷茲海岱之區寔為獄市之寄俗濶達而多知吏紆緩以養名太公始封務行平易之化曹參為相亦隆清淨之風欲詔令之究宣使群黎之悅服則其謀帥尤在得人望之聊試於臨民張敞素長于治劇激貪厲俗高風已震于百城布德施

仁善政竚成于五月復被絲綸之寵亟居鼎軸之崇霈澤生民懋昭賢業某既生盛世夙仰鴻名大袖褒衣獲預掾曹之列輕裘緩帶將瞻君子之威歡抃之誠敷陳曷既

代賀鄭太宰啟

伏審誕膺顯冊還冠上台固執禮經屢上終喪之請難回睿斷嗣聞明詔之頒凡在陶鎔率同鼓舞竊以人子之達孝在于揚名而顯親大臣之致身固將忘身而憂國房喬為貞觀之良弼嘗賜策而起官曲江當開元之盛時亦奪哀而命相眷惟上聖方闡大猷念守文之難必資同德願注意之重獨冠群賢蓋天下不可一日去

公則君子寧俟三年之制恭惟某官學舉六藝才兼四科確乎柱石之資卓爾棟梁之用蚤出逢於熙運俄徧歷于要津職典樞機載陪國論坐運籌策遠暢皇威遂符夢卜之求即正鈞衡之拜有非常之士能立非常之功建無窮之基亦有無窮之問方倚濟川之助遽罹涉岵之悲罔極之報雖深仰成之眷彌切趨襄窀穸之事繼頒賙賻之恩參攷前規遄歸舊貫制思以義非有衣錦之嫌移孝為忠久副虛席之待方將詢封禪之事而廣符瑞之富豈特垂仁義之統而創道德之塗伊尹之享天心咸被堯舜之澤周公之相王室誕保文武之功益膺黃髮之祥永作蒼生之福某斗筭小器樸樾散材

披雲霧而睹青天曩嘗聞于聲咳侍門庭而搯紋筆久
絕望于音塵阻陪班謁之儀竊動彙征之喜

代賀太宰遷少師啟

伏審策勲石室進秩槐庭弼予一人增峻代天之任通
於四海具瞻相國之尊恭惟某官識造幾微學窮繫表
獨執魁柄運量群生默化陶鈞協和衆志休息詩書之
府翺翔道德之林彌綸列聖之猷裒舉舊章之懿謂稽
方冊之布惟文武之同符然辨典謨之篇蓋堯舜之繼
踵允資鴻筆克正宏綱肆巾秩之載新曾歲時之未久
文直事核豈惟配太史之書體大思精固已陋蔚宗之
作歡連九廟慶浹萬邦果奉殊恩亟頒明命密拱重熙

之運永昭垂範之光某夙荷眷存方深庇賴仰棟隆之
吉知注意於賢賢陪鼎輔之良敢竭心于贊贊其如忤
躍曷既敷陳

代都仲憲賀少宰啟

伏審誕布策書延登揆路士夫交慶遠邇一詞眷上聖
之保邦稽前王之圖治用賢人而行善政將坐致於殊
休褒有德而賞元功以寵昭於異教自非學窮閭奧識
造幾微通于時用之宜明于王事之體下可以厲群臣
而厚風俗上可以順四時而理陰陽則何以協贊天工
緝熙帝載總百官之職遂萬物之宜果得真儒來膺茂
典恭惟某官深誠許國直道事君出入累朝周旋衆務

休聲茂實夙推公輔之才遠略壯猷久蘊經綸之志陰
夷自信終始不渝肆召節之初傳寔儒林之傑望造明
朝而承聖問默契淵衷好忠諫而悅至言載登舊德粵
繇真館擢貳西臺嘉績藹聞貴名增重荐頒帝制進秉
國鈞方將謀謨帷幄之中端委廟堂之上明好惡而定
去就務教化而省禁防誦詩書之言施於有政興周召
之業傳之無窮某早辱知憐獲依庇賴奉法承令方逃
失職之誅引領望風莫遂造門之請其於欣誦曷既敷
宣

代都仲憲賀何相啟

伏審揚命王庭躋榮宰席貢賢登用均萬類以蒙休明

詔初傳浹輿情而共慶惟昔用人之謹莫如論相之難
非惟寵冠于當時以昭異數必使道侔於前哲乃允具
瞻恭惟某官識造幾微學窮閭奧寬大好禮久推公輔
之才沉厚有謀夙蘊經綸之志屬聖人嗣承於帝統眷
名儒早侍于經帷亟被選掄徧躋華近至言謹議孰逾
舊學之賢茂實休聲迥出群臣之上遂由選部入贊樞
機方注意於勲庸果繼膺於典冊方將緝熙帝載弼亮
皇猷端委廟堂雅望儀刑於百辟謀謨帷幄威名震耀
於殊鄰某遠將使指阻造鈞閱側聞綸綍之頒益賴帡
幪之賜傾依之素敷述奚殫

代都仲憲賀候樞密啟

伏審顯奉殊恩入參密命側聞乎號寶允僉言惟睿智
之有臨選英豪而並建明安危於廟堂之上獨親萬化
之原運籌策于帷幄之中決勝千里之外宣昭政事輝
耀威靈且得真賢茂膺寵典恭惟某官篤厚有智廉潔
無私學窮游夏之淵源德伏顏閔之軌躅嘉言謹議早
承當宁之知茂實休聲迥出群臣之右果擢參於兵政
以進秉於事樞方將閱禮樂而嫌名詩書坐制四夷之
命重國家而尊社稷遠師三代之風永保榮名益據素
蘊某屬將使指阻造鈞閣承顏接辭仰恃眷憐之舊望
風引領徒深頌詠之歌

代都仲憲賀余門下啟

伏審光奉殊恩誕敷明命輟紫庭之樞近居黃扉之清
華惟睿聖之有臨掩皇王而圖治旁求俊彥並建豪英
揚鴻烈而章緝熙以輔成于先志練群臣而覈名實將
協贊于天工謹選股肱之良增重機衡之寄恭惟某官
行能高妙道術通明論不詭于聖議有益于天下卓爾
公忠之揆凜然勁直之風出入周衛之中徧躋華貫從
容廟堂之上久著嘉猷逮茲溫詔之頒進貳東臺之政
上心允屬物望攸歸嫌名上帝絃而恢皇綱參冢宰之重
職謀王體而斷國論侔先聖之大猷澤被生民名垂後
世某遠將使指阻造鈞閣任職居官方托庇庥之末奉
法承令庶幾罪戾之逃願與斯民永瞻至化

代余帥賀吳門下啟

伏審顯膺睿眷誕布除書輟從真館之優入贊東臺之重士夫交慶遠邇同詞恭惟某官識造幾微學通倫類蚤遇休明之運荐登樞近之聯遠略壯猷卓爾經綸之志碩德重望隱然公輔之才出入備更功效益著肆頒異數允答殊勲頌慚衰朽之資謬竊藩宣之寄大鈞埶北方咸遂於群生屢屋幘幘願永依于巨庇

代都仲憲賀中書侍郎啟

伏審光奉綸言入參機務真賢用而天下治將均四海之休有德進而朝廷尊實為多士之慶恭惟某官辯智闕達仁愛溫良高風無愧於古人雅望久隆於當世北

門待詔陋嚴徐賈馬之文左轄持綱擅魏杜戴劉之美繼宣勞於外屏復就逸於真祠直道以行嘉猷屢告果膺睿眷亟降恩書登處俊於朝蓋資遠識任元超以政豈藉多人方將弼亮天工緝熙帝載建萬世之長策為一代之宗臣某夙荷眷私屬將使指庇身無地知屢屋之幘幘運物無私播大鈞之埶北其於欣頌曷既敷宣

代賀右丞啟

伏審欽承詔綽擢貳政機大廈方成朝廷增重洪鈞所播海宇蒙休竊以黃帝宏大道以明民風后協吹塵之契高宗師古訓以建事傳說膺肖象之求蓋君臣之遇合至難然天人之變通無間惟精神之運默得于萬物

之先故政化之隆終成於千齡之會重復昭于異盛事
宜間出於異人恭惟某官學窮六藝而發為典麗之文
才備衆長而養以恢闔之德夙簡宸衷之眷潛符帝賚
之祥茂實英聲雍容編躋于華貫忠言勁節慷慨思濟
於蒼生時咸後於經綸士久瞻于領袖果茲超拜益侈
異恩方將超唐虞之純風弼乃后于彛憲興周召之遺
業揚茂化於醇醲然後進登上宰之榮永作太平之輔
斯言有證輿誦所同某仰荷眷憐俯深慶賴屬沉簿領
遠分刺史之符願採民謠繼上賢臣之頌

代賀開府相公啟

伏審睿眷酬勲誕揚渙號隆名錫寵增煥具瞻凡叨塊

北之恩咸集幘幘之慶竊以將相之器兼乃中外之樞
極文武之選於一時等威儀之多於三事苟匪社稷之
衛孰為邦家之光恭惟某官冠冕儒林棟梁帝室學造
六經之奧行包九德之純出入三朝陳萬世之長策雍
容二府凜一代之宗臣授節齋壇領祠真館折衝枕席
之上運籌帷幄之中禁幄橫經上論堯舜之道家庭聯
萼遠符周召之風肆推不世之才益懋無窮之業衮衣
赤舄參華鼎足之司豹尾神旗增壯轅門之勢見聞所
暨朝野同詞某晚學無聞效官有守開公孫之閣雖莫
預於曳裾登元禮之門願早諧於望履輒通尺牘仰布
寸誠瞻忭交欣敷陳罔既

代賀太尉啟

伏審高秩厚禮誕昭懋賞之規盛德謙隆存布陳情之
牘願僉言之載穆宜渙號之莫回伏惟某官服勤王家
功帝籍杜預智計每登將相之傳鄧禹文明深執忠
孝之節 七縱七擒之畧揚百戰百勝之威殲厥渠魁
解纜索而夾砧斧屈此羣醜棄兵弩而持鈎鉏豈惟艸
木之知名坐覺山川之改色鳩鳴鵲乳追還樂國之風
蝸舍梟巢盡蕩妖氛之俗偉茲異績夏掩前聞王曰還
歸程伯定繹騷之衆我行永久吉甫均燕喜之恩亟奉
三接之恩存被十行之賜槐庭議政密陪四輔之聯玉
帳論兵益聳一軍之聽仰寵章之狎至知福祿之鼎來
馳慶未遑移書先及倍荷眷存之厚交深愧忤之私

代石提倉賀中丞啟文

伏審顯膺茂渥誕布明綸輒從華省之尊進直南臺之
重士夫交慶遠邇同詞惟上聖之保邦掩前王而圖治
用賢人而行善政既加惠於群生好忠諫而悅至言將
廣延於衆議眷茲風憲之地實為紀綱之司激濁揚清
下察百僚之過繩愆糾謬上裨庶事之微必資亮直之
才迺副簡求之意恭惟某官學窮道奧識造幾先出值
明時亟登要路風采聞於天下名聲重乎朝廷崇論讜
言善諫同乎王魏盡忠納善嘉猷合乎臯夔易地皆然
無施不可暫居武部還總中司周處直筆以震權豪薛

宣執法以分白黑不懲自肅凜然禮義之風持平無私
端若權衡之器懋昭賢業永保榮名某夙荷眷私屬將
使指莫遂門闕之慶敢忘竿牘之修

代賀盛運判啟

自本路常平以賑濟有方就除運判

伏審寵陟文階就陞漕計風聲所暨豈惟聳列辟之瞻
眷遇有加蓋將為多士之勸惟常平之政令寔神考
之規模當歲豐穰必廣儲以抑兼并之室及時水旱將
賑廩以濟窮乏之民能使德意之究宣允賴材猷之膺
敏迨其成績宜有異恩恭惟某官雅性淳融清標濬發
練達當今之務博通前古之宜早自結于主知荐出更
於使事自臨東道亦既淹時屬豐沛之阻飢方聖神之

軫慮明詔每下常恐一夫之憂碩畫既陳果為諸道之
最載懋勲庸之典益據邦國之謀席是寵光竚登禁從
顧如衰朽嘗奉誨言欣幸交深敷陳罔既

代賀韓漕除直秘閣啟

伏審寵膺睿渥進直書林綸命敷聞既聳列城之望使
華增重寔為多士之榮恭惟某官厚德鎮浮高風邁往
多識前世之載博通諸家之書簡在帝表荐更劇任飛
芻輓粟方資轉漕之功攬轡登車已著將明之效眷此
典籍之府允惟英俊之躔自非天下之名儒莫預朝廷
之妙選簪筆持橐從躋法從之聯襲紫傳龜益懋前人
之列顧慙朽質幸假餘光馳慶未遑移書先及其如愧

喜曷易名言

代都仲憲與新提倉啟

伏審顯奉宸恩出將使指側聞成命大慰群情恭惟某
官才為吏師學窮道與身端行治早膺俊乂之求功著
職修久擅循良之舉眷常平之置使實神考之大猷總
斂散之權所以惠民而富國重刺舉之任所以佑善而
懲姦允資成德之髦式副選賢之意况茲東道密迩上
都攬轡觀風已肅范滂之志駐車決事佇聞朱博之威
顧惟衰朽之姿獲奉誨言之末其于欣幸曷既敷宣

代余帥賀維守啟

伏審顯膺中詔出守近邦師帥得賢士夫同慶伏惟某
官性資純粹學問淵深蚤發策於聖時亟躋榮於要路
卓爾公忠之器凜然勁直之風果奉宸恩俾宣王化雖
望之之德蓋雅意於本朝如張敞之才豈久處於閑郡
行被荐延之寵入躋侍從之聯馳問未遑移書先及仰
荷眷存之厚徒深感服之私

代文帥賀淄守啟

伏審光膺中詔移守近邦布政頒條方拊循于善俗望
風引領徒渴仰於高標未遑竿牘之修遽辱緘題之貺
伏惟某官性資愷悌材術通明經行稱于朝廷議論冠
於宗室承流宣化式資共理之親仁善鄰庶假餘光
之照惟聖神之在御思俊乂以旁求宜有褒書以孚輿

論願言調護少副頌瞻

代文帥賀郡守啟

伏審恭承帝詔出守侯藩輿論翕然休聲藉甚伏惟某
官深誠許國厚德臨民學獨造乎淵源行不踰乎閭域
存更事任藹著勞能果奉宸恩寵分郡守承流宣化方
觀政績之成登明選公佇聽褒書之下未遑馳問先辱
移書荷眷意之甚隆激懦衷而增愧

代文帥賀盧君佐啟

伏審拜命中宸分符東土周旋閭里熙然民物之繁懷
想風儀邈爾山川之阻豈期厚禮遠辱移書伏惟某官
夙以才能荐更事任頃被光華之選復膺師帥之求任
職居官益懋賢人之業承流宣化佇觀循吏之風方上
聖之有臨收群豪而並進即期褒召用副輿情

改京官謝宰相啟

鈞最吏曹初無善狀掛名閭籍猥奉明恩願惟缺然何
以稱此竊以六卿之長寔總三銓之流審才藝以叙官
宜明賞罰以詔吏治程功積事既立限年之規舉賢援
能尤嚴薦士之法是將率世而屬俗豈惟激濁而揚清
矧由選甲之冗自躡寘朝行之通秩必脫穎而出者乃
拔茅而征焉蓋其責之甚詳則夫得之匪易固有耆艾
之士運蹇而無成寧容委瑣之人循緣而妄進如某者
長蓬茨之下之甌石之儲疲輒奚勝樸檄莫數思竭其

不肖之力自托于無能之辭慚師友之淵源僅成涉獵
窺文章之林府莫望藩籬揮毫軒陛之前接武措紳之
列少而自喜謂青雲之可期長乃無聞頽黃卷而興歎
栖遲五斗俯仰十年沉迷刀筆之徒勞商確米監之細
務悉匪異時之習類皆俗吏之能勉盡瘁而力行惟固
守以靜俟衆方攘袂而趨者已獨斂衽而避之每懼匪
才自貽罪去豈期公舉謬以名聞方當綜核之期濫預
甄陞之典楓宸屢進再瞻日月之光綸誥臚傳遽被雲
天之澤循涯自失躡等為榮此蓋伏遇某官端委廟堂
謀謨帷幄務隆推于衆善罔求備于一夫眈睠咸加價
必增于數倍輝光所燭氣已變于三春曾經平子之品

題必入山公之啟事遂令駑劣亦玷龍某敢不擇地而
行奉職以進益勵四方之忠愈殫十駕之勤雖闢茸之
中不肯碌碌倘與鈞陶之末願竭區區

除太常博士謝太宰啟

欽奉綸恩擢叅容典量才弗稱被寵增羞竊以漢設太
常之負序先九列唐分博士之屬法止四人豈特替

之儀將使稽古文之事咨詢所逮必淹識於舊章望
實既孚或浸階于華貫矧聖神之御極方明哲之佐時
朝廷尊榮人皆重內天地交泰士以彙征苟非四海之
名流曷副一時之精選伏念某長於蓬茨之下乏無甌
石之儲種學積文栖遲乎道藝之域澡身浴德偃息乎

詩書之門然短綆胡可以級深而駕足曷勝於致遠雖
三餘之不廢曾一善之茂聞濫追俊造之遊徒勞州縣
之役寧抗塵而走俗慙逐巧而黜妍蓋有道而貧賤雖
昔人之所耻如不義而富貴亦君子之弗為迹雖愈窮
志當益壯奪懷中之綬初同臧氏之亡年畀望外之官
終類塞翁之失馬喜庇身之有托繫造物之無私此蓋
某官端委廟堂謀謨帷幄招賢黜不肖既揚於變之風
嘉善矜不能益懋兼容之德旁採措紳之議曲垂埏埴
之恩此日行冲得脩仁傑之藥籠他時毛遂尚出趙勝
之錐囊某敢不勉激懦衷克承嘉惠侍門庭而搢紱篲
方永識於依歸披雲霧而睹青天願少聞于馨咳

謝承旨侍讀啟

識荊州之面已輕萬戶之封得李布之言猶重百金之
賜矧位隆於兩禁而名重於一時擁篲望塵或逡巡而
却走曳裾屬袂爭顛沛以乞憐倘得於眉睫之間遂借
以齒牙之論雖在前世亦所罕聞恭惟某官早推卓爾
之才首副褒然之舉深結明主徧歷要津白日青天共
仰崔群之德太山北斗咸宗韓愈之文自趣召於北扉
亟躋榮於東閣閎侈巨衍不特極靡麗之辭深潤溫純
蓋將追典謨之訓果奉謫仙之譽佇符夢弼之祥經體
贊元入稱四輔代天理物上應三台多士傾心庶邦棧
目苟非傑出之輩孰當特達之知如某者約結固亡竒

樸澁不足教少承世習得免耕穫之勤生遇熙辰未嘗
學軍旅之事區區射策碌碌效官漫逾紀以迄茲顧初
心而自失詩書禮樂之際絕企前修簿書期會之間浸
成俗吏幸歲時之未暮惟仁義之可師方且投身寂寞
之濱安敢妄意寵榮之事徒以鄉邦接壤側聆長者之
風况復兄弟同游嘗聽先生之論輒通漫刺遽假溫顏
廁王戎之坐中既乏阮瞻之三語造叔向之堂下曾微
駸蔑之一言退省庸庸分甘擯斥豈謂荐紳之見慶迺
傳黼黻之誤褒揚若神驚赧然汗下此蓋伏遇某官中
誠接物內恕包荒大臣之報國以人君子之見善如已
謂拔十得五庶間獲于異能故捨短取長務推隆于晚
進某敢不仰承嘉惠俯激懦衷赤鯉隨波既預龍門之
集青蠅附翼願從驥尾之遊欣忭交深敷陳罔既

進秩謝運使啟

備教掾曹每負曠瘼之責量才選部宜從澄汰之科敢
意誤恩亦叨進秩惟本朝之成憲煥古治以同風攷三
載之績以別幽明遠稽虞氏計群吏之治而定誅賞參
用周官必綜核之無私則進退之有序於皇神考增飭
舊章謂百里之民縣令實為之師帥而一州之政幕府
能助其承宣寔資保任之嚴以盡選掄之善凡在所取
蓋拔其尤如某者性本甚愚才無近用奉過庭之訓蚤
聞詩禮之言誦古人之書未免糟粕之累頃塵科第濫

綴官聯計本為貧敢憚徒勞之役職當懃獄惟持近厚之心然而智不足以決疑學不足以明古抗塵容而走俗狀雖每愧于初心追時好而取世資詎肯渝於素守區區自信碌碌止竒曾無根柢之容坐竊甌石之祿迹其遲鈍莫效微勞仰借吹噓遂獲寸進此蓋伏遇某官至誠與下雅量鎮浮本公孫之知人故能舉善同當時之推士用以成名曲垂汲引之仁靡擇行能之備致茲蒙陋亦玷寵榮某敢不思其未能勉其未逮潔已以進期異日之有成直道而行庶終身之寡過上酬恩造次答已知

謝蘇憲舉陞陟啟

駕力奚堪方竊卿雲之庇鴻私所逮遽叨華袞之榮揣薄分以非宜誦煖言而增愧惟邦家之致治莫大於薦延眷士夫之求伸必資乎汲引管仲得志實由鮑叔之知龔勝顯名終藉何侯之力拔茅連茹者多矣彈冠結綬者有焉然人寔難知紛賢愚之並進况士既自售久廉耻之莫興倘默然在稠衆之中而介如之拔聯之勢執手以上遠駕前哲之風傾蓋而交無復下僚之歎靜言斯道每謂難能敢自意於妄庸每辱知于特達伏念某官雅望鎮浮深沉與下明如水鑑白莫遁於妍媸平若權衡本無私于輕重致士吹噓之賜生于顧盼之間豈期清舉謬以名聞此蓋伏遇

某敢不恪守官箴持循士檢雕朽磨鈍期益屬於初心
錯節盤根庶終收于來效

謝提刑薦舉啟

補吏掾曹方虞擯斥挂名奏牘忽預薦論願譴薄之無
堪辱褒揚之甚厚惟本朝之垂憲俾諸道以選能謹
時英出將使指褰帷問俗豈惟博究於民情攬轡觀風
固欲熟知于吏治於以揚清而激濁庶幾怙善以懲姦
倘非達用之才曷副推賢之意如某者受資凡陋涉道
淺疎蚤承訓于義方粗服勤于世習區區射策初無一
日之長碌碌效官甘處衆人之後踵長塗而自媿太
夙好以未能但期罪罟之逃敢冀存書之上此蓋某官上
媿

高風邁往雅望鎮浮蘊厚德以并容推深誠而樂與忠
能舉善恕以及人肆加惠於微生蓋曲崇于末契登門
有舊再叨國士之知承之無聞首借儒林之譽某敢不
俯勤賤役退激懦衷期益勵于初心庶不隳于素守

謝提學舉改官啟

才異正平輒叨薦鶚德優元禮濫許登龍捧檄知榮省
躬增愧國家設銓選之法嚴保任之科雖置使以傍求
猶限負而遴擇伊欲薰蕕之異器庶幾涇渭之分流然
人實難知雜然賢愚之並進士既自售久矣廉耻之無
聞孰興斯道之寂寥必得當世之豪傑伏念某受資至
陋涉道甚疎枕經藉書徒慕古人之糟粕彈冠結綬敢

希君子之經綸蚤射策于明辰僅庇身于小吏抗塵容
而走俗狀每愧于初心追時好而取世資敢隳於所守
居之扳聯之勢曾微左右之先豈繫攬轡之初遽辱拔
茅之舉靜循蕞爾難稱衰然此蓋伏遇某官璞玉渾金
莫名其器青天白日皆見其明廣內恕以包荒蘊深誠
而與下鄭當時之推轂有味其言張安世之提衡不望
其報俾茲么麼亦沐吹噓某敢不俯激懦衷仰承嘉惠
鉛刀無用尚收一割之功駕馬未疲終致千里之遠

謝方提學薦攷察啟

棲遲兩郡每瞻使節之光荏苒十年再奉薦書之寵戴
恩甚厚撫已增羞伏念某樗櫟散材斗筲小器幼承父
兄之訓不識耕獲之勞長讀聖哲之書嘗聞俎豆之事
雖云有志豈曰能成濫借俊造之游徒勞州縣之役沉
迷簿領浸忘舊學之源祇畏簡書僅免大河之域敢期
多幸荐遇深仁昨試東秦庇身屬部侍門庭而搯紱篲
披雲霧而睹青天曾微三語之賢誤辱一言之薦終叨
寸進盡出殊私逮茲歲月之淹復預幘幪之末顧愧瑣
齷齪無足稱焉而蠢直迂疎亦已甚矣豈冀眷存之意
有加疇昔之心此蓋伏遇某官模楷儒林澄清士類謂
青芝赤箭曾為待用之資俾朽木枯株不假先容之助
重垂收拾未忍棄捐某敢不增激懦衷勉承嘉惠藝可
學而行可力罔怠於初心日有益而月有功庶圖于來

效

謝提舉舉陞陟啟

駑力奚堪方竊鄉雲之庇鴻私所逮遽叨華袞之褒捧
檄為榮撫躬增愧惟邦家之致治莫大于荐延眷士夫
之求伸必資乎汲引管仲得志實由鮑叔之知龔勝顯
名終藉何侯之力拔茅茹者多矣彈冠結綬者有之然
人寔難知紛賢愚而並進况士既自售久廉退之莫興
或借勢于諸公之先或掠美于衆人之後或務一切以
追時好或哂百姓以為己功或便僻諧媚以干左右之
容或趨趨囁嚅以伏聲效之側未有不求而得者豈聞
無因而至哉倘默然在稠衆之中而介如之攀援之助

執手以上遠軫古人之風傾蓋而交無復下僚之歎靜
言此道每謂難能敢自意于安庸乃辱知于特達如某
者受資至陋涉道甚疎器僅類于斗筭材莫殊于樸櫟
徒誦詩書之明訓粗聞仁義之大方射策明廷抗塵末
路栖遲五斗俯仰十年在有道而賤貧固賢者之所耻
如不義而富貴亦君子之弗為每貽強項之譏徒欲伸
眉於後比隨常牒依迹外臺效刀筆之小勞初無善狀
興山川之大利又乏竒功方期罪罟之逃敢冀薦書之
上此蓋伏遇某官孤風邁往雅量鎮浮廣內恕以及人
推深誠而與下瞻溝中之斲雖無取於棟梁聽響下之
桐或有中于律呂遂俾易忘之賤亦蒙遴選之榮某敢

不俯激懦衷仰承嘉惠潔已以進期異日之有成直道而行庶終身之寡過

謝判府薦舉啟

試吏屬城方懼曠瘵之責登名奏牘誤承褒薦之私荷眷甚優循躬知愧惟本朝之成憲邈治古之高蹤並達官師旁求俊乂謹攷功能之實尤嚴保任之科將使涇渭分流薰蕕異器英豪無留滯之歎闡茸絕覬覦之心然而人之難知昔以為病潔已者羞于自獻善宦者巧于取容借權竊寵之人或得名于治辦畏法循理之吏或見誚以蠢愚自非明哲之公孰盡選掄之善如某者知能譎薄術業迂疎蚤承訓于義方粗服勤于世習區

區射策碌碌效官錯節盤根曾未施於利器朽株枯木顧誰為之先游豈繫顧盼之餘遽有吹噓之及此蓋某官至誠與下雅望鎮浮校短量長端若持衡之審舉賢達吏藹然推轂之風務施及物之仁不間
之賤褒逾黼黻恩重丘山某敢不增激懦衷益堅素守鉛刀無用尚收一割之功駕馬忘疲終致千里之遠

謝知府薦舉啟

試吏屬城曾之毫釐之效登名奏牘誤蒙黼黻之褒荷眷殊優循躬知愧國家旁求士類謹擇吏員在高位者既號為得賢任下僚者亦虞為曠職苟盡選掄之善孰逾保任之科將使涇渭分流薰蕕異器英豪無留滯之

歎闡茸絕覲覲之心况知人之甚難盖自古之同患達
觀所舉斯盡大臣之能稱匪其人寔為明德之累如某
者知能譴薄術業迂疎潔身無意于近名好古非期于
說衆區區肄業雖不廢于三餘碌碌效官固未聞於一
善拙于干進愚不達時惟期罪罟之逃敢冀薦書之上
此盖某官深誠與下雅量包荒務惟擇于群才不遺忘
於小器聞善有同于己出舉能非以為私恩蕭傳之多
薦儒生鄭莊之好言長者故茲收採誤逮孱微某敢不
益自激昂勉思報稱登龍門而親德既遂于初心附驥
尾以顯名更期于異日

發解謝試官啟

詞場校藝初無語上之才貢牒第名偶與在中之列靜
言忝冒徒切凌兢竊以崇經術者不特右文立邦家者
本於得士在昔長育之道惟時賓興之方自文武而已
隆至成康而大脩嚴四術而立教糾八刑以防姦道德
馨聞旋登司徒之版才能秀出隨錄鄉老之書時無滯
才朝盡公舉菁莪微物在阿陵而獲生棧樸小材為薪
樵而有用可謂盛矣何以加諸世德下衰餘澤浸息三
皇五帝之道鬱而不興諸子百家之書蕩而無法茲風
既扇厥弊彌深惟我宋之勃興追成周而繼作仁祖召
八人而賜坐推廣上庠神考任一相以經邦肇新三舍
逮上聖之纂業先學校以廣聲辟雍大闢于國南洋水

徧布於天下既優結其廩餼復衆建以師儒鳶飛雲翔
魚躍淵泳訓迪經旨開明士心俾藹藹之吉人有德有
造致濟濟之多士來游來歌煥乎成文炳然於變講成
均之良法停科舉之舊章念將發策於此時猶有焚舟
之一戰然而漕臺雄視群俊會奔揚王盧駱之才許史
金張之胄干試者幾一百輩中選者不三十人顧此精
求豈容濫處如某者耨文有志未墨無功類童子之難
言非後生之可畏徒以家傳鉛槧世紹箕裘磨礱于斷
簡殘編漸清於前言往行雖云未達豈曰無知幸遇休
明勉應詔令刻鴻類鶩始誦伏波之言誤墨成蠅何異
不興之畫得踰望外媿溢顏間此蓋伏遇某官大雅兼
容至誠樂育作斯文之龜鑑妍醜自呈為吾道之權衡
重輕隨應得寸長而必取惜片善之或遺假以舟航俾
獲善濟傳之羽翼期遂橫飛致此空疎亦被收採竇雖
稱於公選私自揣其過情某敢不淬礪壯心激昂素志
十駕而致千里不後驂騑一鈞而連六鰲更窮渤澥過
此以往未知所裁

代右丞謝太宰啟

欽承明綍叙進中臺念積媿以無容終罕辭之不獲竊
以貳丞並位雖云分職之均然而九牧其瞻豈曰次遷
之地不特專樞憲之重將使毗鼎輔之隆朝夕論思克
右於厥辟夙夜出納用敷錫于庶民惟報稱之甚難故

褒延之尤謹伏念某學慙洽決識昧幾微獲依日月之光浸被雲天之澤入陪四近坐閱二冬何裨稷契之謀莫踵戴劉之美稽其已試久負空飡寵以不貲復叨誤選此蓋某官道嗣前哲德冠生民下遂萬物之宜獨三公之事見善如己罔求脩于一夫報國以仁方共熙于百志曲借揄揚之賜密形啟沃之餘遂俾愚衷亦膺睿獎敢不懋昭攸訓祇率厥常不命其承益厲匪恭之節尚迪有祿庶恢作人之風

代平定到任謝宰相啟

投閑置散久懷竊祿之差臨衆處官復冒承流之寄被恩浸厚省已奚堪惟上聖之端臨當群賢之拱輔道豐

仁洽屢頒寬大之書訟理政平並協中和之化凡千里之師帥必一時之良能如某者智類挈瓶才非脫穎雖少竊鄉曲之譽而長無左右之容以直鍼而為鈞願何求之可得丕量鑿而正枘宜所向之多艱荐祈直館之優漸卜歸田之計會例從於汰斥益自歎于羈窮此蓋伏遇某官

燮調元化覆冒群生揀

方任能因短長于鳧鶴循名責寔付輕重于權衡遂令衰朽之餘亦預選掄之末某敢不好是正直居以廉平仰布德音盡究款密丁寧之旨俯求民瘼俾銷歎息愁恨之心

代余帥到任謝執政啟

叨奉宸恩出分郡政首宣詔令下慰黎元眷此東藩寔稱巨屏隱若金湯之固旁連海岱之雄太公始封務行平易之化曹參為相亦隆清淨之風將往哲之是希願薄才之難強仰依洪造或賜曲全伏惟某官遠略經邦深誠許國明于王事之體通于時用之宜端委廟堂謀謨帷幄大鈞埜北方咸遂於群生夏屋幘幪願永依於巨庇其於欣幸曷既敷宣

代方閭到任謝執政啟

啣命朔方未遑暖席備負東道復玷除書祇服寵靈俯增悚懼惟齊魯之輿境有孔孟之遺風方國家明道德之原而郡縣謹庠序之教我冠博帶競進於賢關揭節

乘輶寵分於使指宜資德器以重儒林如某者無所取材粗知向道但守經而據古耻曲學以阿時蚤從推擇之私薦誤使令之末往來教路首尾八年徒驚齒髮之侵莫著涓埃之效豈期明詔還畀故棲激濁揚清吏民素知其志尚屬精向道士子亦安于教條庶幾屢試之愚或有一得之補此蓋某官望隆柱石勲著鼎彝端委廟尚儀刑百辟謀謨帷幄燮和萬邦務廣任于群才不遐遺于小器致茲疲劣亦被寵光策蹇磨鉛誓服勤于官守彈冠結綬期終託于已知

代沈和仲除直秘閣賜紫謝執政啟

書林寶秘既假美名命服光華更叨蕃錫撫循榮幸踴

踏兢慚恭惟國家推右文之化迺眷圖籍盛中禁之儲
倬彼東壁之躔煥乎群玉之府故前史著藏室蓬萊之
號而異時建石渠天祿之名博求英俊之流裒進儒雅
之士是謂國家育材之高選豈特措紳稽古之至榮一
職其間四方所仰如某者才非游刃智類挈瓶枕經藉
書竊嘗有志彈冠結綬徒幸逢時蚤緣推選之私浸誤
使令之末頃辭華省出領外臺足食足兵雖暫紆于邊
計餘財餘力蓋悉稟于廟謀方魏闕以馳誠俄甘泉之
入覲宸光咫尺極陳翬翬之思天語溫純爰納斷斷之
介繼被出綸之詔載頒在笥之衣褰賈琮之帷裳已聳
觀于民吏陳亘榮之車服方欣羨于士夫顧寵教之甚

優曾疲駑之敢冀此蓋某官清廟瑚璉大厦棟梁今上嫌名
帝紘而恢皇綱建萬世之長策謀王體而斷國論為一
代之宗臣下闕

代沈和仲河嘗轉官謝執政啟

佐三山之成績初乏微功頒一札之恩書忽叨進秩闕
然自視惕若增羞伏念某性本愚忠才非巧宦乘輶建
節方出領于邊儲造舟為梁莫預聞于廷議徒藉羸餘
於外府庶禪萬一于鳩工蓋職分所當然奚勞能之可
錄敢謂慶賜之下迺蒙褒陟之優拜命無從歸恩有自
此蓋某官端委廟堂謀謨帷幄

顧如疲駑亦在甄獎某敢

不仰遵明訓俯戒素飧知無不為倘效勤于盤錯醜於用賞願畢慮于陶鎔

代沈和仲謝王待制舉自代啟

繇力奚堪謬當清舉袞褒俯逮徒益愧顏歷觀隆古之時咸懋尚賢之典虞廷汲引九官濟濟以相光漢室薦延群士洋洋而並出洪惟聖代並著成規簪筆持荷凡膺近侍之除者拔茅連茹必推名輩而進蓋將察其所安以盡大臣之能豈特選之所表以為異日之用故非道合罔以名聞如某者賦性蠢愚量才冗散少而涉獵莫窮游夏之淵源長則宦游居之求賜之達藝出入屢更于麤使遭逢自結于上知公爾忘私勤于補過長孺

之艱甚矣夷吾之器小哉惟虞衆指之排振敢意當塗之推轂此蓋某官模楷多士羽儀本朝才尤長於治民文最宜於為誥久相待而遠相致羞同勢利之交觀其行而察其言務求亮直之友遂俾無聞之陋亦蒙有味之言某敢不俯激懦衷仰承嘉惠王陽在位願希貢禹之彈冠陳平雖竒終從魏倩而駢乘

代鮑欽止謝洪帥啟

臨衆處官居之治民之效奉令承教幸逃失職之誅夫何過情迺辱清舉竊以報國之大者莫如推賢而進之矧當綜核之朝尤重薦延之選如有所譽以觀大臣之能苟非其人斯為明德之累如某者身遠與寡意廣才

疎雖經學行能莫足算錄然姓名狀貌微簡聖明固嘗
獵居於俊游每輒見罹于吏議流落不偶久自分于投
閑約結無竒願奚堪于假守尚依巨蔭少植枯根豈憶
華袞之榮猶軫綈袍之戀此蓋某官望隆人傑德冠儒
先邁鄭莊之成名本于推轂念王陽之在位宜有彈冠
收其一日之長借以片言之重得踰所望愧溢于顏噓
枯吹生有如此者拉朽磨鈍何以報之誓殫十駕之勤
更試一割之用

代謝崔帥謝陟啟

小吏淺聞曾微善狀大賢容衆猥借餘光雖矜溢美之
榮寔負過情之愧眷聖神之制治方英俊之並游欲野

無遺賢必資乎汲引惟舉不失德迺副于搜揚故凡剡
牘以進焉皆其脫穎而出者矧位隆于從橐而望聳于
帥垣矧睠或加價已增于數倍吹噓所暨律驟變于三
春豈容特達之知亦及蠢愚之輩如某者樸澁不足數
約結果無竒生值熙辰未嘗學軍旅之事少承世習幸
得免耕獲之勤射策明廷抗塵末路詩書禮樂之際已
負初心簿書期會之間浸成俗吏聊固守而靜俟不抑
搯而苟容方慮衆咻亟罹罪罟豈期多可俾預薦書此
蓋某官盛德應時深誠接物君子之見善如已大臣之
報國以人舍短取長務推隆于晚進按十得五庶間獲
于異時故雖甚愚未忍遐棄某敢不恪居官次砥礪廉

隅惟仁義之可師誓堅素守幸歲時之未暮將為後圖

代謝運使少卿奏舉啟

效官承乏初無片善之稱剡牘奏名誤辱一言之譽揆材弗稱被寵為榮竊以為政莫大于選賢報國無先于舉類文子垂聲于晉國本自知人鄭莊發譽于漢廷寔由推士惟本朝之置使俾分道以薦能營職奉公宜有佐時之循吏砥名礪行固多學古之名流敢意庸虛謬當簡拔某奮身寒苦涉世迂踈茅知畏法以遵繩不善養交而持祿區區自效孰為左右之容斷斷無能曾之扳聯之勢退未諧于素志進有愧于明時方竊庇于餘光庶少安于孤迹謹訶是懼薦寵何名此蓋某官恕以

及人清而容物風義可隆于末俗高明灼見于群情校短論長靡責行能之備傍通多可曲垂汲引之私不問賤生亦叨遴選某敢不持循士檢恪謹官常策蹇磨鉛倘粗收于微效飲冰食蘗誓無玷于殊恩

代余帥謝監司走馬啟

入陪國政嘗參東省之榮出領侯藩復冒鈐齋之重惟茲幸會獲庇仁明伏惟某官字量宏通風猷遠雅望素推于當世威名久著于列城顧慚衰朽之姿方竊藩宣之寄瞻風甚邇覲德未諧竚聞臨按之來庶奉誨言之末

代謝林彥振薦舉啟

庇身真館方愧素飡剝牘明廷誤承清舉受非其稱情
靡自寧惟士之逢辰進必資于知己而臣之報國義莫
重于得賢矧當綜核之朝尤謹薦延之寵苟非道合曷
以名聞如某者生于寒鄉系則落譜樸蕞莫足數約結
固亡竒幸免耕獲之勤嘗聞俎豆之事奉法循理雖遵
為治之方任職居官終之瘡人之舉老冉冉而將至情
卷卷而懷歸稍親香火之緣不覺歲時之久求田問舍
念無甌石之儲抑志忍尤坐竊斗升之祿迹其疲曳宜
在謹訶敢意矜憐尚加拔拭此蓋某官望隆柱石勲著
鼎彝為一代之著龜作萬邦之模楷謂拔十得五尚有
補于明時故舍短取長或未忘于小器褒逾黼黻恩重
丘山某敢不礪行砥名剗心養志方將拭目仰觀夏屋
之成願以微軀永託大鈞之播

代伸雅謝舉主啟

薄材難強每懷譴黜之憂厚德兼容更辱褒揚之賜戴
恩甚寵省分知慙竊以為政莫大于得賢報國寔先于
推士孟明敗晉公孫垂舉蓋之稱管仲相齊鮑叔擅知
人之譽故雖等威之有間必資聲氣之相求世德下衰
士風不競睥睨在上無公吐哺之勤嘖嘖於時多安仁
望塵之辱取舍既成於市道窮通畢見于交情惟我治
朝叅稽古制明賞罰之分嚴保任之科營職奉公宜得
佐時之良吏砥名礪行固多學古之儒流願簡拔之甚

明豈庸虛之所覲如某者蠢愚自信孤僻寡徒學經未
明竊有歸耕之志為貧而仕寧辭擊析之卑贈登亨衢
侵尋暮景沉迷簿領幾忘寢食之私顛倒夢魂未免過
差之悔既乏毫釐之效曾無左右之容孰謂高明猥形
論薦此蓋某官孤風邁往雅量包荒廣內恕以及人推
至誠而與下謂溝中之斷雖無取于棟梁而爨下之薪
或有中于律呂遂使易忘之賤亦叨遴選之榮某敢不
恪守官箴持循士檢歸恩有地知夏屋之幘蒙播物無
私托大鈞之塊北永堅素守以畢餘生

代謝薦陞陟啟

效官承之微善最之可稱剡牘奏名辱吹噓之誤及榮

生望表愧集情涯竊以為政本于用賢報國莫如求善
唐堯之先汲引則百工時而庶績凝漢武之重薦延則
群士慕而異人出仰際熙昌之運尤嚴保任之科既稽
衆以旁求必限負而遴選舉不失德于以知大臣之能
稱非其人亦或為明德之累矧位隆于從橐而望竦于
儒林仲尼一字之褒踰于華衮季布一言之諾重于黃
金且得實材用充清選如某者挈瓶智小闕管識微早
襲箕裘粗聞詩禮名嘗忝于論秀恩幸及于賞延學
言偃之淵源僅免面墻之誚政非冉求之達藝
之傷

製錦

遲委吏寧抗塵而走俗慙枉尺以直

尋蓋有道而賤貧固昔人之所耻然不義而富貴亦君

子之弗為迹雖愈窮志方益壯異潘安之巧宦同長卿
之倦遊邈矣青雲但作退飛之鷁忽焉白日徒瞻過隙
之駒自嗟衆目之憐誰復引手而救方念歸休于南畝
尚繫竊食于太倉惟罪罟之是逃豈存書之敢覲他時
毛遂未出趙勝之錐囊此日行冲得備仁傑之藥籠此
蓋某官太山北斗皆仰其高璞玉渾金莫名其器稱量
吾道領袖斯文恕以及人清而容物鄭當時之推轂有
味其言張安世之提衡不望其報收文琴于爨下取犧
尊于溝中致此疲駑亦蒙獎拔某敢不三省自誓千慮
殫愚尺鯉隨波既預龍門之集青蠅附翼終從驥尾之
遊

卷之三

